



Nuuk 24. august 2009

Inatsisartut suleriaasianni § 36, immikkoortoq 1 naapertorlugu matumuuna imaattunik Naalakkersuisunut apeqquteqarpuga:

1. Ullumikkut innarluutilinnik annertusisamik immikkut atuartitsinerup pitsanngorsarneqarnissaanut periarfissanillu allanik iliuuseqarnissamut Naalakkersuisut qanoq iliuuseqarniarpat?
 2. Innarluutilinnik annertusisamik immikkut atuartitsiffiusut ”Specialcenter” Ilulissaniittoq aammalu ”Tungujortuaraq” Qaqortumiittoq siunissami pitsaanerusement inatsisitigut periarfissinniarlugit Naalakkersuisut qanoq eqqarsaatersorpat?
 3. Ilulissani innarluutilinnut annertusisamik immikkut atuartitsiffiusup ”specialcenterip” immikkut akuerineqarluni Ado Lyngep atuarfiatut atuartuutimi 21-nik ukioqalernissaasa tungaanut atugassaqartinneqalersinnaanerata Nalaakkersuisut anguniarsinnaanerpaat?
- (Inatsisartunut ilaasortaq Debora Kleist, Inuit Ataqatigiit)

Tungavilersuutit:

Nunatsinni inuusuttuaqqat inersimasullu innarluuteqarnertik pissutigalugu annertusisamik immikkut aaqqissuussamik atuartinneqarnissaminnut pisariqartitsisut amerliartorput.

Ullumikkut nunatta sinneriaani annertusisamik immikkut atuartitsinissamut Meeqqat Atuarfiat annermik periarfissaavoq. Piffinnilu assigiinngitsuni Meeqqat Atuarfianni innarluutilit pitsaasumik atuartinneqarnissaminnut periarfissaat annikippoq. Tamatumunnga tungaviuvoq immikkut ilinniarsimasunik aammalu ilinniartitsisunik suli nunatsinni amigaateqarneq.

Inuusuttuaqqat inersimanagerullu eqqarsaatigalugit ilaatsigut innersuussutigineqarpoq sunngiffimmi atuartitsinerup ataani atuartinneqarnissamik periarfissaqartut. Tamannalu ilumut periarfissaq pitsaasuullunilu tulluartaunersoq apeqquserusunnarpoq, sumiiffinni assigiinngitsuni ilinniartitsisussat/atuartitsisussat immikkut innarluutilinnut atuartitsinissamut pikkorissarsimasut tamakkiissumik pigineqannginnerat pissutigalugu.

Taammaattumik immikkut atuarfiit soorlu ”specialcenter” Ilulissaniittup Tungujortuaqqallu Qaqortumiittup inatsisitigut pitsaasumik periarfissinneqarnissaat isumaqarnarpoq. Ullumikkummi atuarfiit taakku Meeqqat Atuarfiata ataani inissisimapput. Siunissaq eqqarsaatigalugu Ado Lyngep Atuarfiatut atuartuutimik 21-nik ukioqalernissaasa tungaanut atuartuutigisalerunikkik sullissinerat pitsaasoq suli ineriartorfiulluni angusaqarfiulluassamat.

Ilanngullugu taanngitsoorusunngilara innarluutilinnut efterskoleqalernissaq naalakkersuisut qanoq isumaqarfigineraat imal. iliuuseqarfigissamaarneraat paaserusunnarmat. Innarluuteqaralarlutik kultureqarnikkut ilinniartitaanerullu ataani inuttut nalinginnaasutulli inissisimanissartik pisinnaatitaaffigimmassuk.